

## CART DAN' NYOJ CHE BENE' HEBREO CA'

### Diosen' gwsele' Xi'ine' cont be'lene' benachen' diža'

**1** <sup>1</sup> Cani' Diosen' be'lene' da' xozxta'ocho ca' diža' len bene' gwsele' gosoe' xtižen'. Zan las gosoe' da' bene' ca' xtižen' na' nža'te ca gosoen' to toe'. <sup>2</sup> Perw na'a ba zoa žin ža yeyož yežlion' na' Diosen' ba be'lene' chio' diža' dan' gwsele' Xi'inen' bedezejni'ide' chio'. Na' Xi'in Dios nan' bene' yaba na' yežlio nga len yogo' bichle da' de nga na' gate'teze. Na' bengaquen' con can' gwnalaže' Diosen'. Na' gwžin ža gac lo na' Xi'in Diosen' yogo' benach, beyixe', na' bica'chle da' bene'. <sup>3</sup> Na' Xi'in Diosen' chlo'e catec bene' zaca' nac Diosen', le cayane' nac yichjlaždao' Xe' Diosen' nac yichjlažda'ogüen'. Na' Xi'in Diosen' chone' cont yaban', yežlion' na' da' ca' chle'echo le'e yaban' na' yežlion' chesonen žin, le nape' yela' guac cont chac con can' že'. Len' bzanlaže' cuine' gote' cont bexi beyach chio' len xtola'chon'. Na' beyož bene' ca' beyepe' yaban' zjaychi'e cuit Xe' Diosen' ben' nac bene' zaca' juisyw na' chnabi'e txen len le'.

### Xi'in Diosen' zaca'che' ca angl ca'

<sup>4</sup> Naque' bene' zaca'chgua ca angl ben' cheson žin che Diosen', na' Diosen' bene' cont leca ba chacxenche' ca angl ca'. <sup>5</sup> Diosen' bina' ye'e ne to angl ca dan' gože' Xi'inen', gože'ne':

Len' naco' Xi'ina';  
na'aža ba blo'a zoaczo'.

Na' bina' güe'e diža' che note'teze angl can' bi'e diža' che Xi'inen', gwne':

Neda' gona' cont gacbia' naca' Xe',  
na' gona' cont gacbia' naque' Xi'ina'.

<sup>6</sup> Na' da' nac Xi'in Diosen' la'zelagüe bene' zaca', da'nan' cate' Diosen' gwsele'ne' yežlio nga gwne':

Yogo'lol angl chia' cheyala' yesonxene' le'.

<sup>7</sup> Na' che angl ca' gwne':

Chona' cont angl chia' ca' bene' chesone' žin chia' chesaque' ca be'  
dan' chechj na' chesaque' ca yi' bel'.

<sup>8</sup> Perw che Xi'inen' be'e diža', gwne':

Len' naco' Dios na' nabi'o toli tocanē.

Na' leca güen chnabi'o, chono' con da' zej to licha.

<sup>9</sup> Chebedo' da' zej to licha na' chgue'edo' da' malen'.

Da'nan' neda' Dios ben' chonxeno' ba bena' cont zoacho' mbalazech  
ca note'teze bene'.

<sup>10</sup> Na' da' yoble gozna Diosen' che Xi'inen':

Xana' Dios, beno' yežlion' ža gwlaste,

na' yogo' da' chle'echo le'e yaban' lecze le' benon'.

<sup>11-12</sup> Na' gwžin ža cate' te che yogo' dan' chle'echo le'e yaban' na' lo yežlion',

perw le' bi te chio'; soaczo' toli tocanē.

Na' gwša'a le'e yaban' na' yežlion' ca to bene' chša' xe' cate' ba beyoen na' chaze' yeton.

Na' le'e yaban' na' yežlion', gono' len len can' chon to bene' cate' chotob xe'.

Perw le', tozeczē can' gaco' toli tocanē, gwbat žin ža te chio'.

<sup>13</sup> Diosen' bina' ye'e ne to angl ca dan' gože' Xi'inēn', gože'ne':

Gwche'edo' cuita' nga nabia'cho txen,

na' gona' cont yogo' no chesegue'e le' yosozexjw yichje' yosozenague' chio'.

<sup>14</sup> Na' ca nac angl ca', yogue' zjanaque' bene' cheson xšin Diosen', na' chsele' legaue' chesaclene' chio' ba gwleje' šjayzoacho len le'.

### **Cheyała' gwzenagcho che Diosen' cont yeque'e xtoła'chon'**

**2** <sup>1</sup> Na' da' nac Xi'in Diosen' bene' zaca'ch ca angl ca', do yichj do laže'cho cheyała' gwzenagcho xtižen' da' ba benecho. Le še bi gwzenagcho chen do yichj do laže'cho, guanlaže'chon na' cuejyichjchon.

<sup>2</sup> Diosen' goclaže' yosozenag da' xozxta'ocho ca' che ley che' dan' goseyixjue'e angl ca'. Da'nān' Diosen' bnežjue' castigw da' cheyała' si' to toe' bate'tez bi bosozenague' chen, con ca nac da' mal da' gosone'.

<sup>3</sup> Gague da' yelacho bi si'cho castigw še bi gwzenagcho xtiža' Xancho Jesúsēn' da' gwduxjue'ede' že' chaclaže' gone' yela' mban checho toli tocanē. Da' zaca'chgua da' ben Xancho Jesúsēn' cont gata' yela' mban checho toli tocanē. Cuine' gwduxjue'eden' da' nechw, na' bene' ca' gosēdalen le' bosolo'ede' chio' le naquen da' li. <sup>4</sup> Diosen' bene' cont gosone' da' zaca' yebanecho, na' bnežjue' legaue' zan yela' guac, na' Spiritw chen' benen cont gosone' da' zan da' güen len yela' guac chen. Na' yogo' da' ca' goc con can' gwnalaže' Diosen'. Na' Diosen' bene' ga gosac da' ca' cont nezecho xtiža' Xancho Jesuscriston' naquen da' li.

### **Jesucriston' goque' can' nac chio' beñačh**

<sup>5</sup> Na' gague angl can' yesenabia' cate' žin ža gata' yežlio cobe dan' choe'cho diža' chen. <sup>6</sup> Na' de late' Xtiža' Diosen' gan' nyoj diža' da' be'len to bene' Diosen', gwne':

¿Bixchen' nži'ilažo' neto' beñačh? le bitec bi zaca'to'.

Na' ¿bixchen' chi' yichjo' chacleno' neto'?

<sup>7-8</sup> Beno' cont beñačen' zjanaque' blaο, na' con angl ca'ze zjanaquech blaο ca beñačh.

Na' beno' cont beñačen' naque' bene' zaca' na' cont chacxene'.

Beno' cont yogo'lol da' zjade yesaquen lo na' benach, na' len yogo'lol beyixe' yesacba' lo na'gaque'.

Na' da' ben Diosen' cont yogo'lol da' de yesaquen lo na' benachen' na' yogo' beyixe' yesacba' lo na'gaquen', bibi bocua'an Diosen' da' bi gwlo'e lo na' benachen', la'czla' na'a bina' le'echo yesac yogon' na' yogo'ba' lo na' benachen'. <sup>9</sup> Perw yogo'lol ba yo'ocze lo na' Jesúsén', la'czla' šlac gwzoe' yežlio nga angl ca' gosacche' blaoch ca' le'. Perw na'a da' bzanlaže' cuine' gote', da'nan' Diosen' bene' cont chacxenche' ca' legaque' na' cont nacbia' naque' bene' zaca' juisyw. Le da' nži'ilaže' Diosen' chio' benach, da'nan' bžie' bia' got Jesúsén' cont gac yeque'e xtoła' to to benach.

<sup>10</sup> Diosen' bene' benach, bene' beyixe' ca' na' bite'tezechle da' zjade cont chacxene'. Na' Diosen' chaclaže' bene' zan yesaque' xi'ine' na' šjasyezoe' len le' gan' yo'ochgua be'ni', na' güenna' bene' bžie' bia' gwxaca'zi' Jesúsén' cont gac gone' yela' mban toli tocanē che chio' benach. <sup>11</sup> Jesúsén' ba gwlo'e chio' lo na' Diosen' na' txen len Jesúsén' naccho xi'in Dios. Da'nan' bi cheto'e Jesúsén' ne' naccho biše' lježe'.

<sup>12</sup> Quinga gwna Jesúsén' gože' Diosen':

Gwzejni'ida' bene' biše' lježa' ca' can' nac yichjlažda'oguoñ,  
na' txen len bene' ca' zjandop zjanžag chesonxene' le' gola' gonxena'  
le'.

<sup>13</sup> Nach Jesúsén' gwne':

Neda' soacha' šejnilaža' Diosen'.

Nach da' yoble gozne':

Nga zoa' txen len bene' ca' gwlo'o Diosen' lo na', bene' ca' ba gwque'e  
ca' xi'ine'.

<sup>14</sup> Chion' ba gwca'a Diosen' ca' xi'ine' naccho bene' bela' chen, na' da'nan' Jesúsén' lecze golje' goque' bene' bela' chen cont bnežjo cuine' gosote'ne'. Na' da' got Jesúsén', da'nan' gwzoede' bzoe' šla'ale Satanás dan' chnabia' da' xigüe' ca' na' dan' chonen yela' got che benachen'.

<sup>15</sup> Jesúsén' bene' cont bich chžebcho gatcho, can' chesežeb yezica'chle benach šlac de yela' mban chegaque', chesežebe' yesate'. <sup>16</sup> Jesúsén' bide' yežlion', gague cont gaclene' angl ca', san cont goclene' chio' naccho xi'in diaža che da' Abrahanna'. <sup>17</sup> Na' da'nan' benen byen goc Jesúsén' doxen can' nac chio' benach cont naque' bxož blao checho lao Diosen'. Na' bnežjw cuine' bnitlagüe' xtoła'chon' na' zoe' cheyaše'de' chio' con can' chazlaže' Diosen'. Na' da' bnežjw cuine' bnitlagüe' xtoła'chon', zaca'lebde' ca' bxož blao che nación Israel chechon' ben' gweyē lao Diosen' bexae' chen che beyixe' cont gwnabe' yezi'xen Diosen' xtoła'gaquen'. <sup>18</sup> Na' da' bžaglao Jesúsén' cate' gwlo'oyela' gwxiyen' le' gone' da' mal, perw bibi da' mal bene', da'nan' nezde' naclen' gaclene' chio' cate' chgo'oyela' gwxiyen' chio' goncho da' mal.

### Jesúsen' zaca'che' ca da' Moisésen'

**3** <sup>1</sup> Bene' migw, Diosen' ba gwleje' chio' naccho lo ne'e, na' cheyała' goncho xbab che Cristo Jesús ben' gwsele'. Naque' b̄xoz blao checho na' ben' chejnilaže'cho. <sup>2</sup> Jesúsen' bene' cayanen' gwna Dios ben' gwseła' le' šlac gwde' yežlion', ca'cze ben da' Moisésen' cate' le' goclene' da' xozxta'ocho ca' cani', bene' ca' gosac diaža che Dios. <sup>3</sup> Perw Jesúsen' zaca'che' ca da' Moisésen', le len' b̄xie' diaža che Diosen', na' da' Moisésen' naque' con to bene' za' lo diaža che Diosen'. <sup>4</sup> Gwnita' benach bene' b̄xie' to to diaža yežlio nga, san ca nac Diosen', len' b̄xie' yogo'te da' zjade. <sup>5</sup> Da' Moisésen' goque' ca xmos Diosen' cate' bene' con can' gwna Diosen' cont goclene' da' xozxta'ocho bene' ca' gosaque' diaža che Diosen'. Na' da' Moisésen' be'e diža' che da' za' gac da' za' chixjue'e Diosen' benachen' ca tiempa'. <sup>6</sup> Perw Criston' bi goque' ca to mos dan' gwzoe' bene' can' gwna Diosen', san da' naque' Xi'in Diosen' da'nan' bene' can' gwnen', na' naque' Xan yogo' chio' naccho diaža che Diosen'. Na' da' li naccho diaža che Diosen' še zoachachcho chejnilaže'chone' na' chebecho nezecho gac güen checho.

### Guac soacho mbalaz len Diosen'

<sup>7</sup> Da'nan' cheyała' gwzenagcho can' ža Spiritw che Diosen' len da' nga da' nyojen, žan:

Še Diosen' nie' le'e na'a,

<sup>8</sup> bi gonle güedenag can' goson da' xozxta'ole cani' cate' besyedabague' Diosen' latje daš gan' chesaše'.

<sup>9</sup> Nach Diosen' gwne':

Bi gosejle'e še leda' dan' goša' legaque' gwnežjua' da' yesezaca'zi'e neche xtola'gaquen'.

Bi gosejle'e chia' cate' gosaše' latje dašen', la'czla' choa iz besele'ede' can' bena' len legaque'.

<sup>10</sup> Da'nan' bža'a bene' ca' gwnitan' na' gwnia':

“Yogo' las chesejle'e diža' güenlaže', na' bi chosozenague' chia' cont yesone' can' chazlažan'.”

<sup>11</sup> Nachen' bža'a legaque' na' da' balı gwlo'a gwnia':

“Gwbat nite' mbalaz yesyezi'laže' can' chezi'laža' neda'.”

<sup>12</sup> Bene' migw, bi güe'le latje nabia' da' malen' yichjlažda'ole na' gonen cont cuejyichjle bich šejnilaže'le Diosen' ben' zoa toli tocane. <sup>13</sup> Na' šlac na'a ne' decze latje gwzenagcho che Diosen', le neyoe lježle tža tža cont ne tole bi gonle xbabben' clele, gaquele bibi nonen gontezle da' xinj. <sup>14</sup> Da' li naccho Criston' txen še ne' zoacho chejnilaže'chone' cate' žin ža gatcho, con can' gwzola'cho chejnilaže'chone'.

<sup>15</sup> Nyoj Xtiža' Diosen' che chio', žan:

Še Diosen' nie' le'e na'a,

bi gonle güedenag can' goson da' xoxta'ole cani' cate' besyedabague' Diosen'.

<sup>16</sup> Na' da' žan ca', choen' diža' che da' xoxta'ocho ca' bebej da' Moisésen' nación gan' nzi' Egipto. Gosende' can' gož Diosen' legaque', perw bi bosozenague', besyedabague' Diosen'. <sup>17</sup> Da'n'an' choa iz Diosen' bže'e legaque' neche gosone' da' xinjen', na' gosat ben' besyedabague' Diosen' šlac ne' zjalaže' latje dašen'. <sup>18</sup> Na' legaque', da' bi bosozenague' che Diosen', da' bałi gwlo'e, gwne' bi güe'e latje yesenite' mbalaz yesyezi'laže' can' chezi'laže' Diosen'. <sup>19</sup> Na' nacbia' da' bi gosejle'e che Diosen', da'n'an' bi goc nite' mbalaz yesyezi'laže' can' chezi'laže' le'.

**4** <sup>1</sup> Na' ca' nezecho lecze neche chio' Diosen' gwne' bene' yesejle' xtiže' yesenite' mbalaz yesyezi'laže' can' chezi'laže' le'. Da'n'an' cheyala' gwsaca'cho cont bi goncho güedenag len le'. <sup>2</sup> Chio' ba benecho diža' güen cont gac soacho mbalaz ca diža' dan' gosene da' xoxta'ocho ca' cani', perw diža' da' gosende' bi goclenen legaque', le bi gosejle'en. <sup>3</sup> Na' chio', še chejle'cho da' ža Diosen', ba zoacho mbalaz chezi'laže'cho can' chezi'lažen'. Na' nyoj da' gwne' che da' xoxta'ocho ca', žan:

Nachen' bža'a legaque' na' gwlo'a da' bałi, gwnia':

“Gwbat nite' mbalaz yesyezi'laže' can' chezi'laža' neda'.”

Na' nezecho Diosen' gwzologüe' chezi'laže' cate' beyož bxie' yaban' na' yežlion' na' bichle da' bene' ža gwlaste. <sup>4</sup> Na' zoa late' gan' nyoj Xtiža' Diosen' can' bene' ža gažen', žan:

Xop ža ben Diosen' yaban', na' bichle da' bene' cate' bxie' yežlion'.

Na' bžin ža gaže, bich bi bene', con gwzoe' mbalaz bezi'laže'.

<sup>5</sup> Na' lecze nyojen can' gwne', žan:

Gwbat nite' mbalaz yesyezi'laže' can' chezi'laža' neda'.

<sup>6</sup> Na' ne' naquen da' li bałi bene' yesejle'e xtiža' Diosen' na' nite' mbalaz yesyezi'laže' can' chezi'laže' le', na' bene' ca' gosende' diža' güen chen' cani' bi gosejle'en, na' bi goc yesenite' mbalaz yesyezi'laže' yela' güedenag chegaquen'. <sup>7</sup> Na' gwdechle gwne' Diosen' da' yoble gwne': “Na'a guac nita'le mbalaz yezi'laže'le.” Na' bene' cont da' rey David bzoje' da' nga, žan:

Še Diosen' nie' le'e na'a,

bi gonle güedenag.

<sup>8</sup> Da' Josué gwchi'e da' xoxtao' chio' bene' Israel gan' gosezi'e yežlion' da' bnežjw Diosen' legaque', perw bi bene' cont yesenita' bene' ca' mbalaz yesyezi'laže'. Da'n'an' Diosen' be'e diža' gwdele, gwne' gwžin ža yesenite' mbalaz yesyezi'laže'. <sup>9</sup> Na' da'n'an' bene' ba gwlej Diosen' cont yesaque' lo ne'e, legaque' guac yesenite' mbalaz yesyezi'laže' ca' mbalazen' gwzoe' le' cate' gwzologüe' chezi'laže'. <sup>10</sup> Na' bene' ca' ba nita' mbalaz chesyezi'laže' can' chezi'laže' Diosen', bich chesone' can' ža xbab chegaquen', san chesone' can' ža Diosen'. Da'n'an' žacho zjanite' mbalaz chesyezi'laže' can' zoa Diosen' mbalaz chezi'laže' da' beyož bxie' yogo' da'

zjade. <sup>11</sup> Da'nan' cheyala' güe'laže'cho šejle'cho xtiža' Diosen' do yichj do laže'cho cont soacho mbalaz yezi'laže'cho can' chezi'laže' Diosen' na' cont bi cuiayi'cho can' gac checho še goncho güedenag len xtižen' can' goson da' xozxta'ocho ca'.

<sup>12</sup> Xtiža' Diosen' chazen lo' yichjlaždao' bene' chesenden' na' chaclenen bene' chosozenag chen. Na' zaca'leben ca to spada da' nlachgua chop la'a. Perw chonch Xtiža' Diosen' ca to spada, le chlo'en chio' še chzenagcho che Diosen' o še che cuincho, na' chzejni'in chio' che xbab da' yo'o lo' yichjlažda'ochon' na' len yogo' da' chzelaže'cho še naquen güen o naquen mal. <sup>13</sup> Bibi de da' bi neze nle'e Diosen', ne to benach, angl, da' xigüe' o bi da' zjade. Diosen' nezde' yogo'te da' yo'o lo' yichjlažda'ochon'. Na' gwžin ža nabyožde' chio' che yogo'te da' ba bencho.

### Jesúsen' naque' bꝋoz gwnabia' checho

<sup>14</sup> Jesús ben' naque' Xi'in Diosen' ba beyepe' yaban' na' zoe' gan' zoa Diosen'. Na' naque' bꝋoz blao checho bene' la'zelagüe zaca'. Da'nan' cheyala' soachachcho šejnilaže'chone' can' ba be'cho diža' goncho.

<sup>15</sup> Jesúsen' ben' nac bꝋoz blao chechon' chacbe'ede' bi da' naquen zdebe len chio', le gwxiyen' goclažen' co'oyelan' le' gone' da' mal, na' bžaglagüe' cayanen' chžaglao chio', perw bibi da' mal bene'. <sup>16</sup> Na' dan' zoe' naque' bꝋoz blao chechon' ben' cheyaše'de' chio', da'nan' cheyala' yol güižcho Diosen' gan' chi'e chnabi'e, na' bi žebcho güe'lenchone' diža', nabechone' yezi'xene' checho na' gaclene' chio' bate'teze chacbe'echo chyažjecho gaclene' chio', le nži'ilaže'de' chio'.

**5** <sup>1</sup> Yogo' bene' ca' ba gosaque' bꝋoz blao che nación Israel chechon' gosac lo' ne'e šjasesane' bi da' šjasesane' lao Diosen' na' gosote' beyixe' bosolalje' xchengacba' cont Diosen' bezi'xene' xtoła' da' xozxta'ocho ca'. <sup>2</sup> Na' bꝋoz ca' gosape' yela' chxenlaže' len bene' bina' yesejni'i can' cheyala' yesone' na' len bene' ba nꝋoayag da' malen' legaque', le lecze benach bene' güen da' xinj legaque'. <sup>3</sup> Da'nan' benen byen bꝋoz ca' gosote' beyixe' na' bosolalje' xchemba' cont gosenabe' yezi'xen Diosen' xtolen' lente xtoła' yezica'chle bene'.

<sup>4</sup> Na' ne to bꝋoz ca' bi benxen cuine' neca gwlej cuine' cont gaque' bꝋoz blao, san Diosen' gwleje' to toe' gosaque' bꝋoz blao can' gwleje' da' Aarón. <sup>5</sup> Na' ca'cze goc len Criston', bitw beyiljue' nac gone' cont gacxene', neca gwlej cuine' cont naque' bꝋoz blao checho, san Diosen' gwleje'ne' na' gože'ne':

Len' naco' Xi'ina',  
na'aža ba bena' cont nacia' zoaczo'.

<sup>6</sup> Na' ga yoble nyoj yeto da' gwne':

Naco' bꝋoz toli tocañe can' nac bꝋoz ben' le' Melquisedec.

<sup>7</sup> Na' Criston' šlac gwzoe' yežlion' bol güiže' Xe' Diosen' ben' nape' yela' guac cont yosle' le' bi gate', gwne' zižje na' gwcheže' gwñabe' gaclene' le'. Na' da' bzexjw yichj Criston' bene' con can' gwna Xen', na' Xe' Diosen' bzenague' na' goclene'ne' cont bi bžebe' yela' goten'. <sup>8</sup> Na' la'czla' Criston' naque' Xi'in Dios, bžaglagüe' yogo'lol da' ca' goc che' cate' bzenague' che Diosen' cont gwyejni'ide' can' chac che chio' benach. <sup>9</sup> Na' beyož goc che' yogo'lol da' goclaže' Diosen', nach ba guaue' gwnežjue' yela' mban toli tocane che yogo' bene' yosozenague' che'. <sup>10</sup> Can' naquen, Diosen' gwleje' le' cont naque' bxoz blao checho, na' naque' ca bxoz Melquisedec.

### Gwsaca'cho cont bi cuejyichjcho xtiža' Diosen'

<sup>11</sup> Na' ne' de da' zan da' chaclaža' nia' le'e che da' ngan', perw naquen zdebe nian' ca šejni'ilen, le bich chebele šejni'ilen. <sup>12</sup> Ba gole' gwzejni'ile bene' xtiža' Diosen', perw gualaz da' gonle ca', chyažjele no yozejni'i le'e da' yoble da' ca' bsdle da' nechw. Da'nan' zaca'leble ca to bidao' bina' gac gagw na' con chaže'be'. <sup>13</sup> Na' bene' zjanac ca to bidao' ne' chaže', bina' yesejni'ide' xtiža' Diosen' binlo cont yesone' da' zej to licha len Diosen'. <sup>14</sup> Na' dan' ža xtiža' Diosen' da' naquech zdebe, zaca'leben ca yela' guagw da' chagw bene' gole. Na' bene' chesejni'i lenna' chesacbe'ede' še to da' yesende' o to da' yesone' naquen güen o naquen mal, le ba zjayolagüe' chosozenague' che Diosen'.

**6** <sup>1-2</sup> Cana' betinjecho xtola'chon', gwyejnilaže'cho Criston', na' bsdcho diža' güen che'. Goccho ca to bene' guat len yichjlažda'ochon' neche da' choncho da' xinj, perw ba betinjecho xtola'chon' na'a. Bich chyažjen yezolaocho šejnilaže'cho Diosen'. Bich chyažjen gwsedchcho che dan' chesezoa bene' nis o che dan' chxo'a na'cho yichj bene' na' chñabcho gaclen Diosen' legaue'. Bich chyažjen gwsedchcho can' gac cate' yechis yosban Diosen' bene' guat ca' o caten' chogbi'en yesezaca'zi' bene' ca' ba goson da' xinj. Ba nsedcho da' ca', na' na'a bach cheyala' gwsedcho xtiža' Diosen' da' nacch zdebe cont gacch yichjlažda'ochon' can' nac yichjlaždao' Criston'. <sup>3</sup> Lenna' goncho na'a še Diosen' gonšque' latje.

<sup>4</sup> Nita' bene' ba gwyo'o be'ni' che Criston' lo' yichjlažda'ogaue', na' ba chesacbe'ede' can' nac yela' mban da' chon Criston', na' ba zoa Spiritw che Diosen' lo' yichjlažda'ogaue'. <sup>5</sup> Ba zjanezde' xtiža' Diosen' naquen güen na' ba zjanombi'e yela' guac che Diosen' da' za' gwlo'echde' benachen'. <sup>6</sup> Na' še žin ža bich yesejnilaže' Criston' na' yesebejyichje' xtižen', bich gac yesyetinjde' che dan' ba gosebejyichje'ne', le lo' yichjlažda'ogaue' chesone' txen len bene' ca' bosode'e Xi'in Diosen' le'e yag cruzen', na' chesone' cont nochle bene' yesegue'ede' le'. <sup>7</sup> Cheyala' gac yichjlažda'ochon' ca to yežlio güen gan' chesaz bene'. Cheyož chac yejon' zan ni'a, nach chac cosešen'. Na' chata' dan' cheseyaže' bene' chesazen'. Na' nacbia' Diosen' chebede' yežlion' nac ca'. <sup>8</sup> Bi gaccho ca to

yežlio gan' chla' yag yeše' na' bichle yixē' da' nono chagw. Yežlion' nac ca' bibi zacan', na' ba zoa cuejyichj xanen len na' yixē' da' chla' lagüen žin ža šeyen.

### Nezecho šjayzoacho len Diosen'

<sup>9</sup> Le'e bene' migw, chacda' le'e, na' la'czla' ba bia' dižan' ca', nezda' bilja gonle can' cheson bene' chesebejyichje' xtiža' Diosen'. Chacda' gonle güen da' ba gwlej Diosen' le'e cont šjayzoale len le'. <sup>10</sup> Diosen' zeje' to licha, na' bi ganlaže' can' ba benle xšinen' na' can' ne' chonlen na'a chaclenle yezica'chle bene' chesejnilaže'ne'. Na' chonle ca' da' chaquele Diosen'. <sup>11</sup> Na' chaclaža' to tole soatezle gonchle ca' do yichj do laže'le šlac biña' žin ža gatle, cont nezele šjayzoale len Diosen'. <sup>12</sup> Chaclaža' bi gacle bene' xagüed len da' ža Diosen'. Na' chaclaža' gonle can' ba goson bene' zan bene' gosenite' gosejnilaže' Diosen' cani', gosejle'e gon Diosen' can' gože' legaque' gone', na' gosape' yela' chxenlaže' cate'ch bžin ža benen'.

<sup>13</sup> Cate' Diosen' gože' da' Abraham xi'in diaža che' yesaque' bene' zan, bzoa cuine' gwlo'e da' bali gac can' gwnen', le nono zoa bene' napch yela' gwnabia' ca Diosen'. <sup>14</sup> Gwne': "Da' li goncza' cont gac güen chio' na' cont yesac xi'in diaža chio' bene' zan." <sup>15</sup> Na' Abrahanna' gw dape' yela' chxenlaže' šlac gwleze', nach bžin ža gwzolao chac can' gwna Diosen'. <sup>16</sup> Benachen' zjayolagüe' chosozoe' Diosen' cue'e da' bali che bi dan' chesene', le Diosen' chnabia'che' ca legaque'. Chesone' ca' cont bene' ca' chesacyože' len legaque' yesejle'e na' yesyeyacxenlaže'. <sup>17</sup> Na' Diosen' bzoa cuine' cue'e da' bali cont neze bene' ca' zjanac xi'in diaža che da' Abrahanna' gague da' te che dan' gwne' gonen'. <sup>18</sup> Diosen' bene' chope da' qui: gwne' can' gone' na' lecze bzoa cuine' cue'e da' bali gac can' gwnen', na' gague da' te bi gac can' gwnen'. Chaclaže' chio' ba betinje xtoła'chon' yebecho nezecho šjayzoacho len le'. Na' Diosen' bi chac güe'e diža' güenlaže'. <sup>19-20</sup> Na' da' nezecho šjayzoacho len Diosen', bi soa xbab chechon' quile ca'le. Jesúsēn' ba gwžialagüe' gwyo'e gan' zoa Diosen' gan' nono benach goc šo', na' bene' cont chio' gac šo'cho. Le naque' bxoz blao checho toli tocanē, na' naque' ca bxoz Melquisedec.

### Jesúsēn' naque' ca bxoz Melquisedec

**7** <sup>1</sup> Na' Melquisedequen' goque' rey na' gwnabi'e gan' nzi' Salem, na' Dios ben' nac la'zelagüe bene' blao gwleje' le' cont goque' bxoz. Na' goquen' Abrahanna' zeze'e lao gw dila gan' bene' gan gayo' rey, na' Melquisedequen' jašague'ne' na' gw dixe'ede' gac da' güen che da' Abrahanna'. <sup>2</sup> Ca horen' Abrahanna' zeze'e zonse'e yogo'lol da' jaytobe' da' bene' gan lo yela' gw dila, na' gwlequen' ši cuen na' bnežjue' to cuen che bxoz Melquisedequen'. Na' Melquisedec zejen diža' "rey bene' zej to licha". Na' goque' rey che bene' zjanite' binlo, le Salem gan' gwnabi'e



zejen diža' "zjanite' binlo". <sup>3</sup> Bi nyojen še no goc da' xaxna' Melquisedequen'. Neca nyojen še no goc xoxxta'ogüe', na' neca nyojen baten' golje' na' baten' gote'. Da'nan' žacho Melquisedequen' zaca'lebde' ca Xi'in Dios ben' zoa toli tocane naque' bꝛoz checho, le bi golje Melquisedequen' lo diaža che nochle bꝛoz, na' neca gwzoa nochle bene' lo diaža che' bene' tie' gwlane' xlatje'.

<sup>4</sup> Le gon xbab catec bene' blao goc bꝛoz Melquisedequen'. Da'nan' da' xoxxta'ocho Abrahanna' gwleje' to cuen lo ši cuen da' ca' jaytobe' lo na' rey ca' na' bnežjue' bꝛoz Melquisedequen'. <sup>5</sup> Na' da' xoxxta'ocho bene' ca' gosajje lo diaža che da' Leví, ben' besyeyale' gosaque' bꝛoz che nación Israel chechon', gosone' con can' nyojen le'e ley da' bzoj Moisés, na' bosochixjue' to cuen lo ši cuen yogo' bi da' gota' che yezica'chle bene' gualaž chegaque' ca'. Na' yogo'cze' gosaque' diaža che da' Abrahanna', bꝛoz ca' na' bene' yezica'chle. <sup>6</sup> Perw Melquisedequen' la'czla' bi golje' lo diaža che da' Leví, Abrahanna' bnežjue'ne' to cuen lo ši cuen da' ca' jaytobe', na' Melquisedequen' gwñabde' Diosen' gac güen che da' Abrahanna' ben' gwna Diosen' yesac xi'in diaža che' bene' zan. <sup>7</sup> Na' nezecho bene' chac chñabde' Diosen' gac güen che bene' yoble zaca'che' ca ben' gac che' da' güenna'. <sup>8</sup> Na' bene' ca' zjanac bꝛoz can' ža ley dan' bzoj Moisésen' chesezi'e to cuen güeje lo ši cuen yogo' bi da' de che bene' Israel gualaž chechon', na' bꝛoz ca' zjanaque' con ljež benachcho bene' chesat. Na' che bꝛoz Melquisedequen' ben' gwxi' to cuen lo ši cuen da' jaytob da' Abrahanna', Xtiža' Diosen' choen' diža' che' ca to bene' ne' zoacze. <sup>9-10</sup> Na' da' bnežjo Abrahanna' le' da' ca', guac nacho da' Leví bnežjue' Melquisedequen' to cuen güeje lo ši cuen da' ca', le gwdechle Levín' golje' lo diaža che da' Abrahanna', na' Leví nan' goque' xoxxtao' bene' ca' gosac lo na'gaque' bosotobe' da' ca' bosonežjo bene' Israel gualaž checho ca' che Diosen'.

<sup>11</sup> Na' Diosen' bnežjue' bene' Israel gualaž checho ca' ley chen' cani' cont benen žin txen len da' goson bꝛoz ca' bene' gosajje' lo diaža che da' Levín'. Perw bꝛoz ca' bi goc yesone' cont yichjlaždao' benachen' yesaquen xilaže' len Diosen'. Da'nan' byažjecho bid Jesúsén' naque' bꝛoz checho toli tocane, na' le' naque' ca' bꝛoz Melquisedequen', gague ca da' bꝛoz Aarón. <sup>12</sup> Na' cont goc zoa Jesúsén' naque' bꝛoz chechon', byažjen bža' ley da' nonen mandadw non' gac bꝛoz. <sup>13</sup> Le Xancho Jesúsén' ben' nac bꝛoz chechon' bi golje' lo diaža che da' Leví, na' noch no na' choj lo diaža che Jesúsén' bene' naque' bꝛoz. <sup>14</sup> Nezczecho Xancho Jesúsén' golje' lo diaža che da' Judá, na' da' Moisésén' bi bzoje' le'e leyna' ga nan bene' galje' lo diaža che da' Judán' guac yesaque' bꝛoz.

<sup>15</sup> Na' nacbia' ba bža' leyna', le ba zoa Jesúsén' naque' bꝛoz cobe chechon' na' naque' ca' bꝛoz Melquisedequen'. <sup>16</sup> Bito golje' lo diaža che da' Leví can' gosac bꝛoz ca' bene' goson žin can' ža ley da' bzoj da'

Moisésen', san naque' b̄xoz da' bi gwzoe yela' goten' le' na' zoe' toli tocane. <sup>17</sup> Quinga nyoj da' gwna Diosen' che', žan:

Naco' b̄xoz toli tocane, can' nac b̄xoz ben' le' Melquisedec.

<sup>18</sup> Na' b̄xoz ca' gwna Diosen' nita' cana', bich nžie' bia' nite' na'a, le dan' bžia bia' leyna' yesone' bi goc yeca'an xtoła' benachen' to ši'i. <sup>19</sup> Na' leyna' lecze bi goc gonen cont yesac yichjlaždao' benachen' xilaže' len Diosen'. Perw na'a ba chaquech güen checho, le ba zoa b̄xoz checho bene' ba beca'a xtoła'chon' to ši'i cont zoacho binlo len Diosen' na' chac chnelenchone'.

<sup>20</sup> Na' cont nezecho Jesúsén' naque' b̄xoz checho, Diosen' bzoa cuine' gwlo'e da' bali le soacze Jesúsén' gaque' b̄xoz chechon'. <sup>21</sup> Bene' ca' gosaque' b̄xoz can' bzoj da' Moisésén', Diosen' bitw bzoa cuine' cue'e da' bali cont šejle'cho zjanaque' b̄xoz. Perw nyoj can' gože' Jesúsén', žan:

Diosen' bzoa cuine' gwlo'e da' bali na' bi gwše'e can' ba gože'ne' gone':

“Naco' b̄xoz toli tocane can' nac b̄xoz ben' le' Melquisedec.”

<sup>22</sup> Na' da'nán' zoa Jesúsén' chone' cont nezecho Diosen' gaclene' chio' toli tocane can' gwne' gone'. Na' can' za' gwne' gaclene' chio' na'a, zaca'chen ca da' gože' da' xozxta'ocho ca' cani'. <sup>23</sup> Na' bene' ca' gosaque' b̄xoz can' ža ley dan' bzoj da' Miosésén', gosaque' bene' zan, le cate' gosat tgüeje tgüeje', la' benita'te bene' yoble. <sup>24</sup> Perw Jesúsén' zoe' toli tocane, na' da'nán' naque' b̄xoz checho toli tocane. <sup>25</sup> Da'nán' chac chone' yela' mban toli tocane che chio' chnabcho yezi'xen Diosen' checho, le zoacze' toli tocane chnabe' goclen lao Diosen' che chio' chejnilaže'chone'.

<sup>26</sup> Na' Jesúsén' nacyane' bene' chyažjecho gaque' b̄xoz blao checho cont gaclene' chio', le naque' bene' laždao' xilaže'. Bibi da' xinj none' na' neca none' bi xbab mal, con bibi doła' nape'. Nža'le naque' len benach bene' cheson da' xinj. Jesúsén' ba beyepe' zoe' gan' zoa Diosen', na' chnabi'e txen len le'. <sup>27</sup> Nža'le naque' len b̄xoz blao ca' gosenita' cani'. Legaque' tža tža byažjen gosote' beyixe' bosolalje' xchemba' cont gosenabe' bezi'xen Diosen' xtoła'gaque', na' gwdechle gosote' beyixe' yoble bosolalje' xchemba' cate' gosenabe' bezi'xen Diosen' xtoła' yezica'chle bene' Israel gualaž checho ca'. Perw Jesúsén' šni'aze bnežjw cuine' neche xtoła' benachen' cate' gosote'ne' le'e yag cruzen', na' bi byažjde' gote' beyixe' can' goson b̄xoz ca' tža tža neche xtoła'gaque' na' neche xtoła' bene' yezica'chle. <sup>28</sup> Bene' gosac b̄xoz blao can' ža ley da' bzoj da' Moisésén' gosaque' bene' güen da' xinj can' zjanac yezica'chle bene'. Na' cate' ba goc zan iz bzoj Moisésén' leyna', Diosen' bzoa cuine' gwlo'e da' bali zoacze Xi'ine' Jesúsén' naque' b̄xoz blao checho. Na' Xi'ine' Jesúsén' zoacze' toli tocane na' nac yichjlaždagüen' cayanen' chazlaže' Diosen'.

**Jesúsen' bene' cont gwzolao chac da' cobe da' gwna Diosen' gone'  
cont gaclene' chio'**

**8** <sup>1</sup> Da' nga zejechen lao yogo' da' ba gwnia': zoa b̄xoz blao chechon' ben' nac cayane' chazlaže' Diosen', na' ba chi'e yaban' chnabi'e txen len Diosen' ben' nac la'zelagüe bene' zaca'. <sup>2</sup> Chone' žin gan' zoa Xancho Diosen', gague lo' yo'o dan' goson benach cont yesonxene' le'. <sup>3</sup> Na' yogo' b̄xoz blao che bene' Israel gualaž chechon' nite' chosonežjue' Diosen' bi da' chosonežjue'ne' na' chesote' beyixe' chosolalje' xchemba' lao Diosen'. Na' dan' nac Jesúsen' b̄xoz blao checho, benen byen bnežjw cuine' blalj xchene' neche xtoła'chon'. <sup>4</sup> Na' šaca' ne' zoe' yežlio nga bi naque' b̄xoz, le nita' b̄xoz che bene' Israel gualaž chechon' chjasesane' bi da' chjasesane' lao Diosen' con can' ža ley dan' bzoj da' Moisésen'. <sup>5</sup> Na' bene' ca', chesone' bi da' chesone' lo' yodao' da' naquen ca l̄ gua'a lsaca' che yaban' gan' zoa Diosen'. Na' nezecho naquen ca l̄ gua'a lsaca' che yaban' gan' zoa Diosen', le cate' za' gon Moisésen' yodao' dan' chacte chedobe gan' goson b̄xoz ca' žin che Diosen' cani', Diosen' gože'ne': "Yogo' da' ba gwnia' gonle, le gonen cayanen' blo'eda' le' caten' gwzoacho lo ya'an." <sup>6</sup> Na' da' chon Jesúsen', da' xen zaca'chen ca da' cheson b̄xoz che bene' Israel gualaž chechon', na' can' gwna Diosen' gaclene' chio' lagüe da' bnežjw cuin Jesúsen' neche xtoła'chon', lecze da' xen zaca'chen ca dan' gože' da' xozxta'ocho ca' cani'.

<sup>7</sup> Le Diosen' gože' da' xozxta'ocho ca' gac güen chegaque' še yesone' can' ža ley chen', perw bi bosozenague', na' da'nan' byažjen gwduxjue' to da' cobe. <sup>8</sup> Na' Diosen' bi bebede' legaque', san gwne':

Gwžin ža cate' n̄ia' to da' cobe da' gona' gaclena' le'e nacle xi'in diaža che bene' ca' gosenite' Israel,

na' len le'e nacle xi'in diaža che bene' ca' gosenite' Judá.

Neda' naca' Xanle Dios žia' ca'.

<sup>9</sup> Nža' can' goša' da' xozxta'ole gona' gaclena' legaque' cani',

bži'ilaže'da' legaque' na' bena' cont besyechoje' lo na' bene' nación Egipto.

Legaque' bi gosone' can' goša'ne' cont gac güen chegaque'.

Na' da'nan' gwleza' bich goclena'ne', neda' Xanle Dios žia' ca'.

<sup>10</sup> Na' quinga gona' gaclena' xi'in diaža che le'e nacle bene' Israelen' cate' žin ža:

Neda' Xanle Dios gona' cont šo' yichjgaque' da' nona' mandadw yesone',

na' gona' cont yesyebeden' lo' yichjlažda'ogaquen',

na' toza' neda' yesejnilaže',

na' legaque' yesaque' nación chia'.

<sup>11</sup> Na' bi yažjen yosozejni'i lježe' cont yesombi'e neda',

neca yažjen yosozejni'i no bene' biše' lježe',

le cana' yogo'lole' yesombi'e neda',  
bi' bixjw lente bene' nac bene' gole.

<sup>12</sup> Canan' yezi'xena' xtoła'gaquen', na' bich gona' cuent še bi da'  
malen' ba gosonen'.

<sup>13</sup> Na' Diosen' be'e diža' che da' cobe da' gwne' gone' gaclene' nación  
chechon', na' da'nan' nezecho ba bzoe' to šla'ale da'na' gože' da'  
xoxta'ocho ca' cani'. Na' da' gole da' ba bzoe' to šla'ale ba zoa yeniten.

### Yodao' da' zoa yežlion' na' dan' zoa yaba gan' zoa Diosen'

**9** <sup>1</sup> Cani' Diosen' gože' da' xoxta'ocho ca' gaclene' legaque' na' gac  
güen chegaque' še yesone' can' ža ley chen'. Na' šlac ne' chon žin  
da' nechw da'na' gože' legaque' cani', Diosen' bžie' bia' nacle yesonxene'  
le' na' nacle yesone' yodao' gan' yesonxene' le' yežlio nga. <sup>2</sup> Gosone'  
yodao' da' nsan' chope quart. Na' lo' quart nechon' bosozoe' to candler  
na' to mes gan' bosocue'e yetextil da' naquen che Dios. Na' cuartna'  
bososi'en Latje che Dios. <sup>3</sup> Na' bosozie' to lache' lo' yo'ona' cont bchojen  
chope quart, na' quart gwchopen' bososi'en Latje ga Zoa Dios. <sup>4</sup> Na' lo'  
cuart gwchopen' bosozie' yeto mes de oro gan' bosozeye' yal. Na'  
goseyixjue' to caj da' bosoguazje' oro doxenen. Na' lo' cajen' gosegüe'e to  
yeso' de oro gan' gosegüe'e late' yela' guagw da' nzi' maná, na' gosegüe'e  
carrot che da' Aarón dan' bexeje. Lecze lo' caj nan' gosego'ošagüe' yej  
ta'a ca' gan' byoj yogo' dan' bžia bia' Diosen' yesone' cont gaclene'  
legaque'. <sup>5</sup> Na' cože' cajen' bosonite' chope l' gua'a lsaca' bene' gosone' ca  
angl bene' bososi'e querubines, cont nacbia' zoa Diosen' gan' žia cajen'  
na' naque' bene' zaca' juisyw. Na' cože' cajen' ladjo angl ca' gan' nžiljo  
xilgaquen', bosožie' xchen beyixe' cate' gosenabe' yezi'xen Diosen' xtoła'  
bene' Israel gualaž checho ca' to to iz. Perw bi chonen byen güe'cho diža'  
na'a doxen can' goca'.

<sup>6</sup> Na' beyož gosone' yodaon' na' bosonite' yogo' da' ca' lo'enña', nach  
yogo' ža bxož ca' goso'e lo' quart nechon' na' gosone' can' bžia bia'  
Diosen' gosone' gosonxene' le'. <sup>7</sup> Na' quart gwchopen', toz bxož blao goc  
gwyo'e lo'enña' tni'a tgiiz. Na' cate' gwyo'ena' benen byen bexoe' chen  
che beyixe' bži'en lo' cajen' cont Diosen' bezi'xene' xtole' na' bezi'xente'  
xtoła' yezica'chle bene' Israel gualaž checho neche da' xinj da' gosone'  
sin cbi gosacbe'ede'. <sup>8</sup> Na' da' bi de lsens šo' nochle bene' lo' quart  
gwchopen', Spiritw che Diosen' chzejni'in chio' bina' gac šo' benachen'  
gan' nac latje ga zoa Diosen' šlac ne' chon žin yodao' nechua' lo' yežlion'.  
<sup>9</sup> Na' yodaon' len yogo' da' cheson bxož ca' lo'enña' chlo'en chio' zoacho  
na'a can' chac yaban' gan' zoa Diosen'. Na' la'czla' da' zan chesoe' bene'  
Diosen' na' be zan beyixe' chesote' chesonxene' le', bibi yela' guac zjansa'  
da' ca' cont yesenezde' bibi doła' zjanape' len Diosen'. <sup>10</sup> Na' da' ca'  
cheson bene' gualaž chechon' lo' yodaon' naquen costumbr che no nis  
yela' guagw, no beyixe' chesote', na' nacle cha' chyib cuingaque', na'

bichle da' zjazacan' par cuerp chegaque' na'ze. Na' ba gosonen žin šlac Diosen' biṇa' gwše'e costumbr ca' len da' coben'.

<sup>11</sup> Na' na'a Criston' naque' b̄xoz blao checho na' ba b̄žin ža b̄xie' costumbr güen ca'. Na' zoe' yaban' naque' b̄xoz checho lao Diosen', na' gan' zoen' zaca'chen ca' yodao' da' goson ben̄achen' yežlio nga. <sup>12</sup> Na' bi b̄xoe' chen che no šib no go'n̄ dao' cate' gwyo'e gwn̄abe' cont Diosen' bezi'xene' xtoḷa'chon', san da' bnežjw cuine' gosote'ne' na' blalj x̄chene' neche xtoḷa'chon' t̄ni'aze le'e yag cruzen', da'nan' goc gwyo'e gan' zoa Diosen' na' ba beque'e xtoḷa'chon' toḷi tocan̄e. <sup>13</sup> Na' ley da' bzoj da' Moisésen' nyojen žan da' zan da' cheson bene' da' chonen cont bi chesaque' xilaže' len Diosen'. Na' cont yesyeyaque' xilaže' len Diosen' da' yoble, chyažjen gwže'e b̄xozen' legaque' x̄chen no šib no go'n̄ na' nchixen len de da' chega'an̄ cate' chosozeye' to vaca' dao'. <sup>14</sup> Na' x̄chen Criston' da' bedelalje' neche xtoḷa'chon' zaca'chen ca' x̄chen beyixe' ca', le x̄chenen' cheyonen yichjlažda'ochon' xilaže' len da' xinj da' ba bencho. Da'nan' bich nchoglaon checho gatcho neche xtoḷa'chon', san soaczcho gonxencho Diosen' ben' zoa toḷi tocan̄e. Spiritw che Diosen' goclenen Criston' bnežjo cuine' beque'e xtoḷa'chon', na' bibi xtoḷa' Criston' gota'.

<sup>15</sup> Criston' bedelalj x̄chene' cont gwzolao chac da' coben' dan' gwna Diosen' gone' cont soacho bin̄lo len le'. Na' ba b̄xie' da' coben' cont balteze bene' ba gwlej Diosen' šjasyenite' len le' toḷi tocan̄e. Na' da' got Criston' bedelalj x̄chene', da'nan' gwnitlao xtoḷa' bene' ca' gosejnilaže' Diosen' šlac ne' chon žin dan' gwdixjue' da' nechw dan' gwne' gone' cont chio' bene' Israel soacho bin̄lo len le'. <sup>16</sup> Cate' to bene' ba bene' testament, cate'ch ba gota'bia' ba got bena' ben testamenta', cana'ch gac can' žanna'. <sup>17</sup> Le to testament bi gac can' žan šlac ne' mban ben' ben len. Cate'ch ba gote' canan' gac can' žanna'. <sup>18</sup> Na' goc ca' len da' nechon' da' gož Diosen' da' x̄ozxta'ocho ca' gone' gaclene' legaque'. Da'nan' b̄žie' bia' bosolalje' x̄chen beyixe' cont gwxen. <sup>19</sup> Cate' da' Moisésen' beyož be'lene' da' x̄ozxta'ocho ca' diža' che yogo' dan' b̄žia bia' Diosen' yesone' can' ža ley chen', nach Moisésen' b̄ži'e legaque' x̄chen go'n̄ dao' na' x̄chen šib dao' na' nis. B̄ži'e legaque' da' ca' len late' yiša' xa xila' da' mben color x̄na na' len to xis yix̄e' dao' da' nzi' hisopo. Lecze b̄ži'en lao libren' gan' nyoj ley chen'. <sup>20</sup> Na' da' Moisésen' gože' legaque': "Chen ni ben Diosen' mandadw gwžia' le'e cate' gože' chio' nac goncho cont gaclene' chio' gac güen checho can' gwnen'." <sup>21</sup> Na' lecz ca' bene' b̄ži'e chenna' yodaon' na' yeso' ša' ca' bosochine' gan' gosonxene' Diosen'. <sup>22</sup> Ley dan' bzoj Moisésen' nžian bia' gwže'e b̄xozen' chen lo yogo'ze bi da' chosochine' cont yesyeyaquen xilaže' lao Diosen'. Na' leyna' lecze žan še biṇa' lalj chen, Diosen' bi yezi'xene' xtoḷa' ben̄achen'.

**Criston' gote' blalj x̄chene' cont beque'e xtola' bene' chesejnilaže'ne'**

<sup>23</sup> Can' goc benen byen bosoži'e x̄chen beyix̄e' lo' yodaon' na' lo da' ca' bosochine' yodaon' cont gosonen žin lao Diosen', na' yodaon' naquen con to l̄ gua'a lsaca' da' chzejni'in can' nac yaban'. Perw da' de yaban' byažjen to chen da' zaca'ch. <sup>24</sup> Na' gan' gwyo'o Criston' gague naquen to yodao' da' naquen con to l̄ gua'a lsaca' cont nezecho can' nac yaban'. Le' beyepe' yaban' na' gwyo'e gan' zoa Diosen' cont ch̄ne' gualaz chio' lagüen'.

<sup>25</sup> B̄xoz blao che bene' Israel gualaž checho ca' cheso'e yodaon' t̄ni'a t̄güiz gan' nzi' Latje gan' Zoa Dios na' chosoži'e chen che beyix̄e', perw Criston' bi bnežjw cuine' zan n̄i'a gosote'ne'. T̄ni'aze blalj x̄chene' neche xtola' benachen'. <sup>26</sup> Šaca' byažjen blalj x̄chene' zan n̄i'a, ba gote' zan n̄i'a gwzolaon cate' gwmete yežlion', perw bi benen byen gac che' ca'. Bedelalj x̄chene' t̄ni'aze cate' gwna Diosen' ba bžin ža che', cont chac cheque'e xtola' benach. <sup>27</sup> Na' can' chac che benachen', žin ža gat to toe' na' te yesate' nach na Diosen' che to toe' še yezezaca'zi'e o še yesenite' mbalaz. <sup>28</sup> Na' can' yesat benachen' t̄ni'aze, ca'cze bnežjw cuin Criston' t̄ni'aze gosote'ne' cont chac cheque'e xtola' benachen'. Nach žin ža yide' da' yoble perw gague cont yeque'e xtola' benachen', san cont yeche'e bene' ca' chesebeze' batcan' yide' nach n̄ite' mbalaz len le'.

**10** <sup>1</sup> Ley da' bzoj da' Moisésen' len costumbr da' nžian bia' goncho cate' gonxencho Diosen' bzejni'in chio' late'lasze che da' güen da' ba chac checho na'a ba bid Criston'. Perw leyna' bi goc yocoben yichjlaždao' bene' ca' gosejnilaže' Diosen' la'czla' gosote' beyix̄e' yogo' iz. <sup>2</sup> Šaca' yichjlažda'ogaque' beyaquen güen cate' gosote' beyix̄e' ca' na' cate' b̄xoz ca' bosoži'e legaque' x̄chemban' neche xtola'gaquen', ba gwnitlao xtola'gaquen' to ši'ize šaca', na' bich bi yesacde' lo' yichjlažda'ogüen' che da' xinjen' chesonen'. <sup>3</sup> Perw da' chesote' beyix̄e' ca' na' bichle da' chesone' neche xtola'gaquen' to to iz, bi chac yesanlaže' zjanape' dolā'. <sup>4</sup> Le x̄chen no go'n̄ dao' no šib dao' bi gac yeca'an xtola' benach.

<sup>5</sup> Da'n̄an' cate' Criston' bide' yežlio nga gože' Diosen':

Dan' chesote' beyix̄e' na' dan' chjasesane' bichle da' chjasesane' laguo', gague da' can' zelažo'.

Zelažo' gwnežjw cuina' gona' can' chazlažo', le da'n̄an' beno' cont golja benach.

<sup>6</sup> Da' chesote' beyix̄e' chosozeye'ba' laguo' na' yogo' da' ca' chesone' cont yezi'xeno' xtola'gaquen', gague da' can' chbedo'.

<sup>7</sup> Da'n̄an' gwnia' can' nyoj le'e libr gan' žan: “Dios chia', za'a nga zedeyena' con can' chazlažo'.”

<sup>8</sup> Zgua'tec Criston' gože' Diosen': “Dan' chesote' beyix̄e' na' dan' chjasesane' bichle da' chjasesane' laguo', na' dan' chosozeye' beyix̄e' cont yezi'xeno' xtola'gaquen', gague da' can' zelažo' na' gague da' can' chbedo'”, la'czla' leyna' nžian bia' yogo' da' ca'. <sup>9</sup> Nach Criston' gože'

Diosen': "Za'a nga zedeyena' con can' chazlažo". Da'nan' nezecho ba bzoe' to šla'ale dan' bžie' bia' gotcho beyixe' cont yezi'xene' xtoła'chon', na' gualaz len, blalj xchen Criston' cont beque'e xtoła'chon'.<sup>10</sup> Na' da' ben Jesucriston' con can' gwyazlaže' Diosen' cate' bnežjw cuine' gosote'ne' tñi'aze cani', da'nan' ba beyac yichjlažda'ocho xilaže' lao Diosen', chio' chejnilaže'chone'.

<sup>11</sup> To to bxoz che bene' Israel gualaz checho ca' con nita'cze' chesotcze' beyixen' tža tža na' chosoži'e xchemba' can' ža leyna' cheyała' yesone', la'czla' xchen beyixen' bi gac yeca'an xtoła' benachen'.<sup>12</sup> San Criston' tñi'azen' bnežjw yela' mban che' na' zaca'czen cont yeca'an xtoła' benachen' toli tocañe. Na' beyož bnežjw cuine' zjaychi'e gan' chnabi'e txen len Diosen'.<sup>13</sup> Na' zoe' chbeze' žin ža yosozexjw yichj yogo' bene' chesegue'e le' na' yosozenague' che'.<sup>14</sup> Na' da' bnežjw cuin Criston' tñi'aze cani', bene' cont chio' naccho lo na' Diosen' beyac lažda'ochon' xilaže' toli tocañe.<sup>15</sup> Na' Spiritw che Diosen' lecze benen cont nezecho naquen ca', le nyojen, žan:

<sup>16</sup> Quinga gona' gaclena' legaque' cate' žin ža,  
gona' cont šo' yichjgaque' da' nžia' bia' yesone',  
na' gona' cont yesyebeden' lo' yichjlažda'ogaquen',  
can' ža Xancho Diosen'.

<sup>17</sup> Na' nyoj yeto da' ža Spiritw che Diosen', žan:

Na' bich gona' cuent še bi da' malen' ba gosonen' o še bi xtoła'gaque'  
ba gota'.

<sup>18</sup> Na' cate' ba gwnitlao xtoła'chon' bich chyažjen gotcho no beyixe'  
neche xtoła'chon'.

### **Cheyała' soacho gonxencho Diosen' neca žebcho**

<sup>19</sup> Bene' migw, nezecho gac šo'cho gan' zoa Diosen' neca žebcho, le Jesucriston' blalj xchenen' na' beque'e xtoła'chon'.<sup>20</sup> Guac nacho gwsaljue' to nez cobe, to da' chonen chio' yela' mban toli tocañe, le da' bnežjw cuine' gote' neche chio', guac šo'cho gan' zoa Diosen' na' bich naquen ca part yodaon' da' ngaše' len lache' da' ze gan' nono gac šo'.

<sup>21</sup> Na' zoa bxoz blao chechon' naque' bene' zaca'chgua, na' naque' Xan yogo' chio' gwlej Diosen' cont chejnilaže'chone'.<sup>22</sup> Da'nan' cheyała' soacho gonxencho Diosen' do yichj do laže'cho neca žebcho, na' cheyała' soacho šejle'cho xchen Jesucriston' ba beca'an xtoła'cho, le nezecho ba gwzoacho nis da' chejnilaže'chone'.<sup>23</sup> Na' can' gwzolaacho be'cho diža' gwnacho šjayzoacho len Diosen', ca'cze cheyała' goncho bate'teze, na' da' li šjayzoaczcho len Diosen', le zoacze' chone' con can' gwnen'.<sup>24</sup> Lecze cheyała' yeyiljwlaže'cho nacle gaclen lježcho cont gaquech lježcho tocho yetocho na' gonchcho da' güen.<sup>25</sup> Na' bi cuejyichjcho da' chdop chžagcho txen chonxencho Diosen' ca chesebejyichj bal bene'. Cheyała'

neyoe lježcho soaczcho šejnilaže'cho Criston', na' gonchcho ca' na'a ba nacbia' ba zoa te che yežlion'.

<sup>26</sup> Še ne' chontezechcho da' xinj la'czla' ba nombia'cho diža' li che Criston', bibi de bichle da' gon žin cont nitlao xtoła'chon'. <sup>27</sup> Na' cheyała'cze žebcho gon Diosen' cont saca'zi'cho še ca', na' yeyejcho lo yi' gabilen' gan' cuiayi' yogo' bene' chesegue'e Diosen'. <sup>28</sup> Cani' da' xoxxta'ocho ca' gosote' note'teze bene' bi bzenague' che ley da' bzoj da' Moisésen', bi besyeyaše'de' legaque', con še gwnita' chope o šone bene' toz can' goso'e diža' che da' xinjen' none'. <sup>29</sup> Na' da' mal juisyoch gac che chio' še gue'echo Xi'in Diosen' na' gaquecho bibi zaca' xchen Criston' da' blalje' cont beque'e xtoła'chon' na' še necho che Spiritw che Dios ben' nži'ilaže'de' chio'. Le da' blalj xchen Criston' gwzolao chac da' cobe da' gwna Diosen' gone' gaclene' bene' yesejnilaže'ne'. <sup>30</sup> Nombia'cho Diosen' na' nezecho len' gwne': "Neda' yoži'a che da' mal da' chesone' na' neda' gona' cont yesezaca'zi'e." Na' lecze nyojen žan: "Xancho Diosen' chogbi'e nac gac che bene' ca' ba gwque'e ca xi'ine'." <sup>31</sup> Na' leca naquen da' žebcho še cuejyichjcho Diosen' ben' zoa toli tocañe, le gone' cont saca'zi'cho toli tocañe.

<sup>32</sup> Perw le šjayza'laže' can' bchejele da' zan da' gwdi gwxcaca'le cate' beyož gwyo'o be'ni' che Criston' lo' yichjlažda'olen'. <sup>33</sup> Tgüejje gosezi'diže' le'e lao yogo' bene' yež na' tgüejje cate' gosotlate' le'e na' bichle da' bosochi bososaque' le'e, na' da' juisyw da' goquele cate' gosonde' bene' lježle ca'. <sup>34</sup> Beyaše'le bene' lježcho ca' bene' gosata' ližya na' goclenle legaque', na' gwzoale mbalaz la'czla' bene' besegue'e le'e goseque'e bi da' gota' chele, le nezele de da' zaca'ch chele yaban' da' bi te chen. <sup>35</sup> Da'nan' bi cuejyichjle da' chejnilaže'le Diosen', neca žeble, le žin ža cate' soachgualle mbalaz. <sup>36</sup> Cheyała' gwyo gwchejle cont yeyož gonle yogo'lol da' chnalaže' Diosen', na' tena' gone' cont soale mbalaz toli tocañe can' gwne'. <sup>37</sup> Can' nyoj Xtiža' Diosen', žan:

La' žinte ža yid ben' sela' gan' zoalen', bich šede'.

<sup>38</sup> Na' xi'ina' bene' zjanac bene' güen len neda' yesata' yela' mban che' toli tocañe da' chesejnilaže' neda'.

Na' še bich yesejnilaže' neda', bich yebeda' legaque'.

<sup>39</sup> Perw chio' bi naccho ca' bene' ca' bich yesejnilaže'ne', bene' yesebiayi'. Chio' zoaczcho chejnilaže'chone' na' šjayzoacho len Diosen' toli tocañe.

### Da' chejnilaže'cho Diosen' naquen to da' zejen

**11** <sup>1</sup> Še chejnilaže'cho Diosen' nezecho gac da' güen da' chbezcho gac, na' nezecho gon Diosen' gac can' že' da' biña' le'echo. <sup>2</sup> Bal bene' gwlas ca' bebe Diosen' legaque' da' gosejnilaže'ne'.

<sup>3</sup> Da' chejnilaže'chone' chejle'cho con gwnie' na' goc yaban' len yežlion'. Na' bibi bchine' da' le'echo cate' bene' yogo' da' ca' chle'echo.



<sup>4</sup> Cani' da' xoxxta' ocho Abel gwejnilaže' Diosen' na' da' nan' bnežjue' Diosen' to da' gocch da' güen ca da' bnežjw bene' biše' Caín. Na' dan' bebe Diosen' dan' bnežjw Abelen' le', da' nan' gwneze Abelen' naque' bene' güen len Diosen'. Na' la'czla' ba got Abelen', da' gwzoe' gwejnilaže' Diosen', naquen ca to da' chneyoen chio' soaczcho šejnilaže'cho Diosen'.

<sup>5</sup> Na' lecze da' xoxxta' ocho Enoc gwzoe' gwejnilaže' Diosen', na' da' nan' Diosen' bezi' beque' ene' šlac ne' mbane'. Bi gote', con noch no ble'e le'. Na' nyoj Xtiza' Diosen', žan Diosen' bebede' Enoquen' šlac gwzoe' yežlion'. <sup>6</sup> Na' Diosen' bi chebede' note'teze bene' bi chejnilaže'ne'. Le note'tez bene' yol güiže' Diosen' cheyała' šejle'e zoacze Diosen' na' šejle'e gwnežjue' yela' mban toli tocane che note'tez bene' nabden' le' do yichj do laže'.

<sup>7</sup> Na' ca nac da' Noé, lecze gwejnilaže' Diosen', na' cate' Diosen' bosnide' le' can' za' gac, gwejle' Noén' can' gož Diosen' le', na' do bžebe' bene' to barcw gan' gwo'e len bene' lo' yo'o che' ca' cont bi gosate' lo nisen'. Na' da' gwejle' Noén' can' gwna Diosen', blo'ede' yezica'chle bene' že' na' zjanape' doła' da' bi bosozenague' che Diosen'. Na' lecze da' gwejnilaže' Diosen', goc gwna Diosen' naque' bene' güen len le'.

<sup>8</sup> Da' Abrahanna' lecze gwejnilaže' Diosen'. Da' nan' bzenague' cate' bol güiž Diosen' le' na' gože'ne' šeje' ga de to yežlio zito' da' gaquen che'. Na' gweje' la'czla' bi nombi'e latjen'. <sup>9</sup> Na' Abrahanna', da' gwejnilaže' Diosen' jasoe' laž bene' zito' da' gwna Diosen' gac che' na' gac che xi'in diaža che'. Gwzoe' lo' yo'o de lache'ze na' lecz lo' yo'o de lache'ze gwnita' xi'ine' Isaaquen' na' xi'in xesoe' Jacob bene' lecze gož Diosen' gac yežlion' čhegaque'. <sup>10</sup> Abrahanna' gwzoa gwleze' ca' lo yežlion', le gwnezde' žin ža šjayzoe' gan' zoa Diosen' gan' naquen to ciuda güen da' bi te chen, ciuda da' ben Diosen'.

<sup>11</sup> Na' Saran' no'ol nac no'ol che Abrahanna', la'czla' naque' bene' güiž na' naque' bene' gole par soa xi'ine', Diosen' bene' to yela' guac cont gwzoa xi'ine', le gwejle'e gon Diosen' con can' gwne' gone'. <sup>12</sup> Ca' goquen' gwzoa bi' che da' Abrahanna' la'czla' goque' bene' gole par soa xi'ine', nachen' xi'in diaža che' gosaque' bene' zan can' zjanac beljw ca' na' can' nac yox da' chi' cho'a nisaon' da' nono chac gwlab.

<sup>13</sup> Yogo' bene' ca' ne' chesejnilaže' Diosen' cate' bžin gosate'. Na' la'czla' bina' gac lo' na'gaque' dan' gože' legaque' gac čhegaquen', bi gosacžejlaže', san gwnite' mbalaz gosejle'e gwžin ža gon Diosen' can' gwnen'. Goso'e diža' zjanaque' ca bene' zito' len bene' že' lo yežlion' na' bibi lažgaque' de lo yežlion'. <sup>14</sup> Na' da' goso'e diža' bibi lažgaque' de yežlion', nacia' gosezelaže' yesyežine' ga yoble gan' gac lažgaque'. <sup>15</sup> Šaca' gosone' xbab che yežen' gan' gosaljen' naquen lažgaque', gota' latje jaya'aque' šaca', perw bi gosone' xbab en' ca'. <sup>16</sup> Gosezelaže' yesyežine' yaban', le gosejle'e na' len' nac lažgaque', na' gosenezde'

nacchen güen ch ca yežlion'. Da'nān' Diosen' bi cheto'ede' c̄hegaque' že' naque' Dios ben' chesonxene', na' ba benšagüe' to ciuda gan' zjanite'.

<sup>17</sup> Na' Abrahanna' da' gwejnilaže' Diosen' da'nān' bzenague' cate' Diosen' bene' l̄e' prueba gože'ne' cheyala' got xi'in̄e' Isaaquen' lao Diosen' cont gonxene'ne'. Ba zoa gote' xi'in̄en' la'czla' gw̄nezde' Diosen' gože'ne':

<sup>18</sup> “Gona' cont n̄ita' xi'in̄ diaža c̄hio' beñe' yesac xi'in̄ diaža c̄he Isaaquen'.” <sup>19</sup> Da' Abrahanna' bechoglaže' gote'be', l̄e' gw̄nezde' Diosen' chac chosbane' beñe' guat. Perw na' Diosen' bi be'e latje gote'be'. Da'nān' guac n̄acho bosbane'be' ladjo beñe' guaten', la'czla' gague gotbe'.

<sup>20</sup> Gwdechle Isaaquen' gwejnilaže' Diosen'. Da'nān' gw̄nabde' Diosen' gone' güen len xi'in̄e' Jacob na' Esaú. <sup>21</sup> Lecze da' Jacoben' gwejnilaže' Diosen'. Da'nān' cate' ba zoa gate', gw̄nabde' Diosen' gone' güen len xi'in̄ xesoe' ca' bin' gosac xi'in̄ da' José. Na' b̄cheque' yichje' benxene' Diosen' n̄chiše'teze' carrot c̄he'. <sup>22</sup> Na' da' Josén' gwejnilaže' Diosen', na' gwejle'e žin ža yesyechoj beñe' gualaž c̄he' ca' Egipton' can' gwna Diosen'. Nachen' cate' ba zoa gate' b̄žie' bia' yesyeyo'e žit benat c̄hen' cate' yesyeya'aque'.

<sup>23</sup> Cate' golje da' Moisésen', da' l̄eca gosejnilaže' xaxne'en Diosen', bi besežebe' yesyedabague' dan' b̄žia bia' reyen' yesone', gwne' cheyala' yesote' bi' byo c̄hegaque' ca'. Šone bio' bosocuaše'be' ližgaquen', l̄e' gosacde' nacchguabe' xdan. <sup>24</sup> Nach bi' no'ol c̄he rey beque'ebe' boscha'ogüe'be'. Perw cate' ba gwcha'o da' Moisésen' b̄žone' yesone' l̄e' ca' xi'in̄ bi' no'ol c̄he rey c̄he Egipton', l̄e' gwejnilaže' Diosen'. <sup>25</sup> Da'nān' gwyazlaže'che' b̄žaglagüe' txen len beñe' gualaž c̄he' ca' yogo' dan' bososaca'zi' beñe' Egipto ca' legaque', cl̄el ca' gone' txen len beñe' Egipto ca', l̄e' gocbe'ede' yob te c̄he yela' chebe c̄he da' xin̄j ca' cheson' legaque'. <sup>26</sup> Goclaže' b̄žaglagüe' can' b̄žaglao Criston' cont bene' can' gwyazlaže' Diosen', bi gwzelaže' gac c̄he' yogo' yela' gw̄ni'a da' de c̄he beñe' Egipto ca', l̄e' gw̄nezde' gwžin ža gon Diosen' cont soe' mbalaz. <sup>27</sup> Na' da' gwejnilaže' Diosen', bi b̄žebe' rey cate' b̄žin ža besyechoje' Egipton' la'czla' reyna' b̄ža'achgüe' legaque', con gwzoacze' bzenague' c̄he Diosen'. Gw̄nezde' zoacze Diosen' la'czla' bi chle'echone'.

<sup>28</sup> Nach Moisésen' da' gwejnilaže' Diosen' b̄žie' bia' da' xozxta'ocho ca', beñe' že' to to yo'o gosote' to xila' dao' na' bosoži'e xchemban' ližgaquen', cont angl beñe' nsa' yela' got bibi goc gonde' bi' byo nechw lo' to to yo'o. <sup>29</sup> Na' da' xozxta'ocho ca' gwnita' cani', da' gosejnilaže' Diosen' da'nān' Diosen' bene' cont Nisdao' Xnan' goquen' c̄hople, na' bla' yo biž gacholen' cont goc goselaguen'. Perw beñe' Egipto ca' cate' gosaclaže' leze yeselague' nisdaon', bocuaše' nisa' gan' chesedien', na' gosate' gose'eje' nisen'.

<sup>30</sup> Lecze da' gosejnilaže' da' xozxta'ocho ca' Diosen', da'nān' Diosen' bene' cont bebix ze'e da' gwechj doxen ciuda Jericó cate' gosechje' ze'en yogo' ža lao gaže ža. <sup>31</sup> Na' da' no'olen' le' Rahab, no'olen' goque' no'ol

zle', lecze gwyejnilaže' Diosen', na' da'nan' bi gwžiaye'e txen len yezica'chle bene' Jericó bene' bi bosozenague' che Diosen', le blebe' chop da' xozxta'ocho ca' ližen' cate' jasegüia jasene'e lažen'.

<sup>32</sup> Ba gwnita'ch bene' zan bene' gosejnilaže' Diosen', perw bi de tiemp gua' diža' che da' ben' gože' Gedeón, che da' ben' gože' Barac, che da' ben' gože Sansón, che da' ben' gože' Jefté, che da' rey David, che da' Samuel, na' che yezica'chle bene' goso'e xtiža' Diosen' cani'. <sup>33</sup> Da' gosejnilaže' Diosen' besechoje' gosone' gan cate' gosedile' len no rey, na' bale' gosaque' bene' gwnabia' na' gosone' byen goson bene' yoble da' güen, yebale' besele'ede' ben Diosen' bi da' güen da' gwne' gone' len legaque', yebale' Diosen' bene' cont bež znia bi gosagwba' legaque' na' bi gosoneba' legaque' zi' cate' gosegüe'e legaque' gan' že'ban'. <sup>34</sup> Lecze da' gosejnilaže' Diosen', bale' bi goseye' cate' bene' bosozale' legaque' lo yi', yebale' besyele' cate' bene' gosaclaže' yesote' legaque' len spada, yebale' beyon Diosen' legaque' bene' gual cate' bich zjanale', yebale' goclene'ne' gosaque' soldadw gual cont gosone' gan cate' soldadw bene' zito' gosedillene' legaque'. <sup>35</sup> Na' gwnita' no'ol ca' da' gosejnilaže' Diosen' da'nan' Diosen' bosbane' no bene' lo' yo'o chegaque' ladjo bene' guat ca'.

Na' gwnita' bene' yoble, da' gosejnilaže' Diosen' da'nan' gosate', bi gosaclaže' yesyele' lo na' bene' mal ca'. Goso'e latje bosochi bososaque' legaque', le gosenezde' gwžin cate' Diosen' yechis yosbane' legaque' ladjo bene' guat ca' cont yesenite' len le'. <sup>36</sup> Gwnita' yebal bene' leca gosezi'diža' bene' legaque' na' leca goseyine' legaque', na' bosochije' legaque' gden na' goseyixjue' legaque' ližya. <sup>37</sup> Na' bene' ca' besegue'e legaque' gosote' legaque', bale' bosochele' legaque' yej, yebale' bosozoxje' cuerp chegaquen' len sier, yebale' gosote' len spada. Na' bal bene' ca' gosejnilaže' Diosen' benen byen gosaše' yixe' zjanyaze' no xa xila' no xa šib. Bibi gota' chegaque', leca nyaše' gosac chegaque' catec bosochi bososaca' bene' legaque'. <sup>38</sup> Gosaš goselaže' do latje daš, do ya'adao', do ga ze bloj na' ga zoa no liž beyixe'. Yogo' da' ca' goc che bene' ca' gosejnilaže' Diosen', la'czla' zjazaca'chgüe' na' bene' že' yežlio nga bi zjzaque' yesenite' txen len legaque'. <sup>39</sup> Diosen' bebede' yogo' bene' ca' da' gosejnilaže' le', perw šlac gosenite' bina' gone' yogo' da' güen da' gwne' gone' che xi'in diaža che da' Abrahanna'. <sup>40</sup> Le goclaže' gone' ga gac che chio' zoacho na'a yogo' da' güen da' gwne' gone', cont txen len bene' ca' gosejnilaže'ne' cani', yeyož gaccho can' chazlažen'.

### Cheyała' soacho goncho xbab che Jesúsén'

**12** <sup>1</sup> Nezecho ba gwnita' bene' zan gosone' da' güen neche da' gosejnilaže' Diosen', na' dan' gosonen' chzejni'in chio' can' cheyała' goncho. Da'nan' cheyała' gwzoacho ca'ale še bi da' chžonen goncho can' chazlaže' Diosen' na' cuejyichjcho bi da' xinj da' choncho, le da' xinjen' chziye'czen chio'. Na' cheyała' soatezcho goncho can' ža

Diosen' sin cbi yeche'echo. <sup>2</sup> Jesúsén' bene' cont gwzolao chejnlaže'cho Diosen' na' gaclene' chio' cont soaczcho šejnilaže'chone' yežintecho gan' zoe'na'. Na' cheyała' soacho goncho xbab ca Jesúsén' byo bčeje' len da' gwdi gwxaque' cate' gosote'ne' le'e yag cruzen'. Bi bžone' yesonde' le' da' zan da' naquen da' zban juisyw, le gwnezde' za' gon Diosen' cont soe' mbalaz len le'. Na' na'a Jesúsén' ba chi'e chnabi'e txen len Diosen'.

<sup>3</sup> Cheyała' goncho xbab can' byo bčejaže' Jesúsén' len yogo' da' ca' gosone bene' mal ca' le' na' bene' can' gwna Diosen'. Na' ca'cze cheyała' gwyo gwčejaže'cho goncho can' chazlaže' Diosen' la'czla' še chaquechon zdebe; bi cheyała' yeche'echo. <sup>4</sup> Da' zan da' ba bžaglaole chdillenle da' malen', perw biña' lalj xchenle na' biña' yesote' le'e. <sup>5</sup> ¿Ba gonlaže'le can' ža Diosen' chneyoede' chio' can' chon bene' chneyoe xi'ine'? Nyoj xtiže'na', žan:

Xi'indagua', bi gacdo' bibi zejen da' chnežjo Xancho Diosen' le' da' saca'zi'o' cate' chono' bi da' xinj,  
na' bi gaco' tole cate' chdile' le'.

<sup>6</sup> Le Xancho Diosen' chzejni'ide' yogo' bene' chacde',  
na' chnežjue' da' saca'zi' yogo' bene' ba gwque'e ca xi'ine' cate'  
chesone' da' xinj.

<sup>7</sup> Cheyała' gwyo gwčejaže'cho cate' Diosen' chone' chio' da' saca'zi'cho, le chonde' chio' ca benachen' chonde' xi'ingaque'. Le yogo'ze bidao' chnežjo xaben' lebe' castigw cate' chontezbe' da' xinj. <sup>8</sup> Na' še bi chon Diosen' da' saca'zi'cho cate' chontezcho da' xinjen', zeje diža' bi naccho xi'ine', le yogo' bene' ba gwque'e ca xi'ine' chnežjue' da' yezacazi'e cate' chesontezbe' da' xinjen'. <sup>9</sup> Yogo' xaxna'cho bosogole' chio' yežlio nga na' gosone' castigw checho cate' bi da' xinj bencho, na' nezecho ca'cze cheyała' yesone'. Nacchxe cheyała' gwzenagcho che Xacho Diosen' bite'teze da' chzejni'ide' chio', cont šjayzoacho len le' toli tocanē. <sup>10</sup> Na' xaxna'chon' to chop izzen' šlac bosogole' chio' gosone' castigw checho con ca gosaclaže'. San Diosen' nezde' bi da' nac güen par chio', na' chdile' chio' na' chone' da' saca'zi'cho cont gaclenen chio' soacho goncho da' güen na' gac lažda'ochon' xilaže' can' nac lažda'ogüen'. <sup>11</sup> Na' bite'tez da' chyi chzaca'cho, šlac chaquen bi chazlaže'chon, perw cate' ba gwden chaclenen goncho da' zej to licha na' chaclenen soacho binloch len xbab da' yo'o lo' yichjlažda'ochon'.

### Diosen' gone' da' saca'zi'cho še bi gwzenagcho che'

<sup>12</sup> Da'nán' le soa le gon can' chazlaže' Diosen' sin cbi yeche'ele. <sup>13</sup> Le soa le gon da' güen cont gaclenle bene' ca' ne' chesacžejaže' naquen' yesone' cont legaque' yosozenagche' che Diosen' na' bi yesebejyichje' xtižen'.

<sup>14</sup> Le yeyiljwlaže' nacle gonle soale binlo len yogo'cze bene', na' le gwzenag che Diosen' cont gac lažda'olen' xilaže', le nono yežin gan' zoa

Diosen' še bi nac lažda'ogüen' xilaže'. <sup>15</sup> Le gaclen lježle cont ne tole bi ganlaže'le catequen' nži'ilaže' Diosen' chio', le cate' chzolaicho choncho güedenag len Diosen', bedao' chcha'o chxenen na' guacte gonen cont bene' zan yesonche' da' xinj. <sup>16</sup> Bi gata'lenle bene' byo bi nac bene' chele o no'ole bi nac no'ol chele. Na' bi gue'ele da' naquen da' zaca' len Diosen' can' ben da' bene' gože' Esaú, ben' bše'ede' to platw yela' guagw da' cheyala' gwnežjo Diosen' le' dan' golje' goque' bene' nechw. <sup>17</sup> Nezele gwdechle goclaže' yeyac lo ne'e da' bdie' lo na' bene' biše', perw bich bi goc bi gone' cont yeyaquen lo ne'e la'czla' gwcheže' catec gwzelažen'.

<sup>18</sup> Nža'le chac che chio' na'a na' can' goc che da' xozxta'ocho cani' cate' Diosen' bnežjue' legaque' ley chen'. Cate' betje' lo ya'a Sinaí gwyečhj yi' bel ya'ana', gwxoan žen, beyaquen chol, na' gwyečhjchgua be'.

<sup>19</sup> Gosende' gwchež to trompeta, na' gosende' be' Diosen' diža' len legaque'. Na' besežebchgüe' na' gosata'yoede' Moisésen' bich güe'len Diosen' legaque' diža'. <sup>20</sup> Besežebchgüe', le Diosen' ba gožle' legaque' še noe' yesebigue' lo ya'an cheyala' yesote'ne' yosochele'ne' yej, na' lecz ca' yesone' še len beyixe'. <sup>21</sup> Da' zaca' žebcho goc lo ya'an, lente da' Moisésen' gwne': "Leca chaž chžeba' can' chaquen'."

<sup>22</sup> Perw chio' chejnilaže'cho Criston' ba naccho txen len Diosen' ben' zoa toli tocañe na' len yogo' angl che' bene' že' yaban' chesonxene'ne', bene' zjanaque' bene' zan juisyw. Da'nan' guac nacho ba gwbiga'cho lo ya'a Sión dan' lecze nzin' ciuda Jerusalén da' chi' yaba gan' zoa Diosen'.

<sup>23</sup> Na' naccho txen len yogo'lołte bene' chesedop chesežag chesonxene' Jesucriston' gate'teze, bene' zjanyoj lagaque' le'e libr che Diosen' da' de yaban'. Na' yogo' chio' chejnilaže'chone' zaca'lebcho ca bi' nechw to lo' yo'o, bi' chzi' byen che xaxna'be', le si'cho da' güen da' gon Diosen' chio'. Na' naccho txen len Diosen' bene' choglaogüen' che yogo' benach še de xtoła'gaque'. Lecze naccho txen len bene' ca' ba gosat, bene' gosaque' bene' güen lao Diosen' da' gosejnilaže'ne', na' na'a ba beyož zjanacyane' can' chaclaže' Diosen'. <sup>24</sup> Na' naccho txen len Jesús ben' blalj xchene' cont gwzolao chac da' coben' da' gwna Diosen' gone' gaclene' benachen'. Na' blalj xchene' cont ba bnitlao Diosen' xtoła' chio' chejnilaže'chone'. Da'nan' xchen Jesús en' zaca'chen ca xchen da' Abelen' da' gwłalj caten' betw bene' bišen' le'.

<sup>25</sup> Da' mal juisyw še goncho güedenag len Diosen' cate' chñe' chio'. Bene' cont gosezaca'zi' da' xozxta'ocho ca' cate' gosone' güedenag len xtižen' da' gwnelene' legaque' lo yežlion' cani', na' gonche' da' saca'zi' chio' še goncho güedenag len xtižen' da' chole'lene' chio' lo' lažda'ochon' zoe' yaba na'ate. <sup>26</sup> Leca gwxo' cate' Diosen' betje' lo ya'a Sinaín' cont be'lene' da' xozxta'ocho ca' diža'. Na' na'a ba gwne': "Gwžin ža cate' gona' xo' yežlion' da' yoble, perw gague yežlio na'zen', san lente yogo' da' chle'echo le'e yaba." <sup>27</sup> Na' da' gwne' gone' xo' da' yoble, zejen te che yogo' da' ca' ben Diosen' da' chle'echo, perw bi te che Diosen' na' che

yogo' da' güen da' chone' da' bi chle'echo. <sup>28</sup> Da'nán' cheya<sub>la</sub>' güe'cho yela' choxc<sub>len</sub> che Diosen' da' gone' cont šjayzoacho mbalaz txen len le' gan' chnabi'e, na' gague da' te che da' güen da' gac checho len le'. Nach lecz cheya<sub>la</sub>' gacbe'echo bene' zaca'chgua nac Diosen' cont gonxenchone' do yichj do laže'cho can' chazlažen'. <sup>29</sup> Cheya<sub>la</sub>' gwzenagcho chen', le Dios chechon' leca chgue'ede' da' malen', na' sele' lo yi' gabil bene' ca' bi yesy<sub>etinj</sub>de' che da' xinjen', da'nán' zaca'lebde' ca' yi' bel.

### Da' chazlaže' Diosen' goncho

**13** <sup>1</sup> Bitw gwsanle gague lježle, le yogo'cho chejnilaže'cho Jesucriston' naccho ca biše' lježcho. <sup>2</sup> Na' bi ganlaže'le cheya<sub>la</sub>' gwleble bene' za'ac zito' ližlen' bene' chesejnilaže' Jesucriston'. Bal xoxxta'ocho ca' cate' bosolebe' bene' zito' ližgaquen' bosolebe' angl bene' gwsela' Diosen' neca gosacbe'ede'.

<sup>3</sup> Cheya<sub>la</sub>' gonle xbab che bene' lježcho ca' chesata' ližya cont gaclenle legaque'. Na' cheya<sub>la</sub>' gonle xbab can' gale'le šaca' chac chele can' chac che bene' ca'. Na' bi ganlaže'le bene' lježcho bi da' choso<sub>chi</sub> chososaca' bene' legaque', le šlac ne' mbancho, cuerp chechon' guac saca'zin' da' quinga. Na' cheya<sub>la</sub>' gonle xbab can' gale'le šaca' chac chele can' chac che bene' ca'.

<sup>4</sup> Na' le'e nšagna'le, yogo'le le soa do laže'le len no'ol chele o bene' chele na' bi talenle bene' yoble, le Diosen' gone' saca'zi' bene' chesata'lene' no'ole bi zjanac no'ol chegaque' o bene' byo bi zjanac bene' chegaque'.

<sup>5</sup> Bi cheya<sub>la</sub>' selaže'cho mechon', san cheya<sub>la</sub>' soacho becho bi da' dao' da' de checho, le Diosen' ba gwne' che to tocho: “Bi ganlaža' le' na' bi cuejyichja' le'.” <sup>6</sup> Da'nán' bibi de da' žebcho, na' to tocho guac nacho: Xana' Diosen' zoe' chaclene' neda'.

Bi žeba' bi da' gone benachen' neda'.

<sup>7</sup> Le šjayze'e bene' gwnita' bosozejni'ide' le'e xtiža' Diosen'. Le gon xbab can' gosone' cont yogo'ze bene' gosacbe'ede' gosenite' gosejnilaže' Diosen', na' le nita' le šejnilaže' Diosen' can' gosonen'.

<sup>8</sup> Na' can' nac yichjlaždao' Jesucriston' nej nase, ca'czen' naque' ža na'aža, na' ca'czen' gague toli tocane. <sup>9</sup> Bi güe'le latje yeseziye' bene' le'e len bi diža' yoble da' chosozejni'ide', le nža' xen can' chososed chosolo'e bale'. Da' chon Diosen' lo' lažda'ochon' neche da' nži'ilaže'chgüede' chio', lenna' chaclenen chio', gague da' ca' chesena bene' cheya<sub>la</sub>' ye'ej gagwcho. Na' ca' nac da' ca' chesene' cheya<sub>la</sub>' ye'ej gagwcho cont yebe Diosen' chio', bina' yesaclenen bene' ca' chesene' cheya<sub>la</sub>' gagwchon, na' neca gaclenen chio'.

<sup>10</sup> Xancho Jesucriston' bnežjw cuine' gosote'ne' neche chio', na' da' chejnilaže'chone' ba gwnitlao xto<sub>la</sub>'chon'; perw bene' ca' ne' chosolalje' xchen beyixe' na' chosozeye'ba' cate' chesenabe' yezi'xen Diosen'

chegaque', da' got Jesucriston' bi chaclenen legaque'. <sup>11</sup> Nezecho tni'a tgiiz bene' nac bxoz blao che bene' Israel gualaž checho ca' chesote' beyixe' na' chjasesane' xchemba' lo' yodao' gana' nzi' Latje ga Zoa Dios cont chnabde'ne' yezi'xene' xtola' yogo'lol' gaque'. Nach yezica'chle bxoz ca' chosozeye' cuerp che beyixe' ca' cho'a yežen'. <sup>12</sup> Na' ca' ca'le goc che Jesús'en' dan' gosote'ne' cho'a ciuda Jerusalénna' cate' bnezjw cuine' cont beque'e xtola'chon' len xchene' dan' blaljen'. <sup>13</sup> Da'nan' cheyała' šejnilaže'cho Jesús'en' na' cuejyichjcho costumbr gol ca', la'czła' yesegue'e bene' chio' da' choncho ca'. <sup>14</sup> Gate'tez zoacho lo' yežlio nga da' te chen, perw chbezcho šjayzoalencho Diosen' lo' ciuda da' bi te chen. <sup>15</sup> Da' ba beca'a Jesucriston' xtola'chon' cheyała' güe'cho yela' choxclen che Diosen' yešlale mbancho, gonxenchone' len xtiža'chon'. Lenna' da' chaclaže' Diosen' güe'chone'. <sup>16</sup> Na' cheyała' soacho goncho da' güen na' cheyała' gwnežjwcho con gaca'te da' saque' gwnežjwcho gaclencho bene' bi de chegaque', le chazlaže' Diosen' cate' chonxenchone' choncho ca'.

<sup>17</sup> Le gwzenag che bene' chososed cheselo'ede' le'e xtiža' Diosen' na' le güe' latje yesene' naquen' gonle, le chosogüia chesene'e le'e cont chesaclene' le'e len yichjlažda'olen', na' legaque' cheyała' yosyodie' cuent lao Diosen' še naquen' ba gosone'. Le gwzenag chegaque' cont yesyebede' na' cont da' chesone' bi gaquen to da' zdebe, le še gonle güedenag len legaque', bibi da' güen chga'an chele še ca'.

<sup>18</sup> Le nab cont gaclen Diosen' neto'. Nezeto' chonto' can' chazlaže' Diosen' na' chaclaže'to' gonto' con da' naquen güen. <sup>19</sup> Na' leca chata'yoeda' le'e yol güižle Diosen' nable yob gac yidcha' gan' zoalen'.

### Chnabe' gaclen Diosen' legaque'

<sup>20</sup> Na' na'a zoa Diosen' chone' cont zoa chbezcho binlo len xbab da' yo'o lo' yichjlažda'ochon'. Len' bechis bosbane' Xancho Jesucriston' ladjo bene' guat, le da' blalj xchenen' le'e yag cruzen' gwzolao chac da' cobe da' gwna Diosen' gone' gaclene' bene' yesejnlaže'ne'; na' gague da' te che dan' gwne' gonen'. Na' da' nži'ilaže' Xancho Jesucriston' chio', zaca'lebde' ca to bene' güeye' xila' bene' chon da' güen juisyw len be che' ca'. <sup>21</sup> Na' chnabda' Diosen' gaclene' le'e bite'tez da' chyažjele cont soale gonle yogo'te da' güen can' chazlažen', na' gone' cont gac yichjlažda'ochon' cayanen' chaclaže' lagüe da' nombia'cho Jesucriston'. Le gonxen Jesucriston' toli tocanē. Na' ca' gonšcaczcho.

<sup>22</sup> Bene' migw, chnabšca' bi gaquele zed da' ba bzoja' le'e chneyoeda' le'e nga, le bitec naquen da' tone. <sup>23</sup> Na' chzenda' le'e bene' migw checho Timoteon' ba bechoje' ližyan' na' chbeza'ne' nga. Na' še yob yele'e nach chi'ane' cate' yedena'a le'e.

<sup>24</sup> Ca nac neda', chguapa' tiox bene' blao ca' chosozejni'ide' le'e na' chosogüia chesene'e le'e, na' lecze chguapa' tiox yogo' nochle bene'

chesejnilaže' Diosen'. Bene' lježcho ca' za'ac Italia lecze chosoguape' le'e  
tiox.

<sup>25</sup> Diosen' gaclenšque' le'e. Da' na'zen' chzoja'.